

22. november 2022

UKA200/175

Apeqqueteqaat aallavigalugu oqallisissaq, qanoq iliorluta aatsitassat nunatsinnut nunaqavissunullu iluaqutaanerulersinnaavagut?

(Inatsisartunut ilaasortaq, Mariane Paviassen, Inuit Ataqtigiit)

Nunatsinni aatsitassaatitta nunatta inuinit annertunerpaamik iluaqutaallutik atorneqarsinnaanissaat pillugu Inatsisartunut Ilaasortap Mariane Paviassenip apeqqueteqaat aallaavigalugu oqallisissiaanut Siumumit ima oqaaseqassaagut.

Nunatsinni aatsitassanik piiaanerit atuinerillu nunatsinnut inuinnullu aningaasarsiornikkut iluaqutaanerpaasunngorlugit ingerlanneqartarnissaat Siumup politikkeraa.

Nunatta pisuussutaanut tamanut oqartussaanerput Namminersoneq pillugu inatsisikkut naqissuserneqarpoq, taamaalilluta nunatta pisuussutaasa qanoq atorneqarnissaat pillugu tamakkiisumik oqartussaanerput qulakkeerneqarluni. Aatsitassarsiornernerup nunatsinni aningaasaqarnitsinnut annertuumik sunniuteqarsinnaanera Siumup eqqumaffigaa upperaalu.

Pisuussutivut uumaatsut aatsitassat, ikummatissat ujaqqallu erlinnartut niuernikkut iluaqutiginissaat siunertaralugu misissuinerit ingerlaannassapput, tamatumani erngup, seqernup anorillu nukingini atuinikkut tunisassiorsinnaaneq ilanngullugu.

Siumut isumaqarpoq aatsitassanut inatsit tamakkiisumik nunatta inuinit iluaqutaanerusinnaanngorlugi suliareqqinnissaa piffissaasoq. Tamannalu ilutigalugu Siumumit isumaqarpugut Namminersornerup eqqunneqarnerani Naalagaaffimmik aatsitassat pillugit isumaqatigiissutigisimasarput nalilersoqqinneqartariaqartoq. Nunatsinni aatsitassarsiornikkut isertitat iluanaarutit allallu nunatsinnut tamakkiisumik tuttarnissaat angusariaqarparput.

Oqaluttuarisaaneq kingumut qiviarlugu nunatsinni aatsitassarsiortoqartarsimavoq, aamma nunaqqativut suleqataasarlutik. Taamaattorli suli inuiaqatigiittut aatsitassarsiornernerup inuussutissarsiutitut isiginera suli annertugisassaangilaq. Taanna mumisinniarlugu meeqqat atuarfiini nunatta pisuussutai uumaatsut pillugit ilinniartitsisarsinnaaneq ilanngullugu aqutissiunneqartariaqartoq Siumumit isumaqarpugut.

Aatsitassarsiorneq, ujaqqanik erlinnartunik allanillu passussineq aatsaat ineriartuleruttorpoq, immaqa assersuunneqarsinnaalluni piniartuunermiit aalisartuunermut ikaarsaariartornermi pisunut. Kulturimimmi allanngineq amerlanertigut nangaaffigineqaaqartarpoq iluatsiniaasaaqartarlunilu, taamaattoq iluatsikkaangani aamma iluatsilluarsinnaasarluni, soorlu aalisartuni maanna takusinnaagipput tamanna.

Nunatta pisuussutaanut atuinissamut sinaakkutit pingaartupilussuupput. Siumumit isumaqarpugut nunaminertanik atuisinnaanerit atuutsiinnarneqartariaqartut, taamaattoq nunaminertanik atuisinnaanermut akuersissuteqarnikkut piumasaqaatit nalilersoqqinneqartariaqarput. Tassa atuinissaanermik akuersissutaateqarnermi nunaminertamik atuinissaq salliunneqartassasoq, uninngatitsiinnartoqarnani.

Ulluni makkunani annikitsumik aatsitassarsiortartut isumasioqatigiinnerat ingerlanneqartoq Siumumit ilisimavarput. Neriutigaarpullu kinguneqarluartumik aatsitassarsiortartut suleqatigilluarneqarumaartut.



Taakkuuppummi sapiiserlutik inerisaajumallutik aallartissimasut, soorlu piniartuunermut aalisartuunermut ikaarsaartut siulliit taamaassimassasut.

Siumumit aatsitassanut inatsisissamik suliaqarsinnaanermut aallartitsisoqassappat oqaloqataanissatsinnut piareersimavugut. Qilanaarpugullu oqallinnermi peqataanissatsinnut.

Dines Mikaelen, Siumut